

עבדיה

1

הפרק 1

חזון עבדיה כה אמר אדני יהוה לאדום שמועה שמענו מאת יהוה וציר בגוים שלח קומו ונקומה עליה למלחמה

²הנה קטן נתתיך בגוים בזוי אתה מאד

³זדון לבך השיאך שכני בחגוי סלע מרום שבתו אמר בלבו מי יורדני ארץ

⁴אם תגביה כנשר ואם בין כוכבים שים קנך משם אורידך נאם יהוה

⁵אם גנבים באו לך אם שודדי לילה איך נדמיתה הלוא יגנבו דים אם בצרים באו לך הלוא ישאירו עללות

⁶איך נחפשו עשו נבעו מצפניו

⁷עד הגבול שלחוך כל אנשי בריתך השיאוך יכלו לך אנשי שלמך לחמך ישימו מזור תחתיו אין תבונה בו

⁸הלוא ביום ההוא נאם יהוה והאבדתי חכמים מאדום ותבונה מהר עשו

⁹וחתו גבוריך תימן למען יכרת איש מהר עשו מקטל

¹⁰מחמס אחיך יעקב תכסך בושע ונכרת לעולם

¹¹ביום עמדך מנגד ביום שבות זרים חילו ונכרים באו שערו ועל ירושלם ידו גורל גם אתה כאחד מהם

¹²ואל תרא ביום אחיך ביום נכרו ואל תשמח לבני יהודה ביום אבדם ואל תגדל פיך ביום צרה

¹³אל תבוא בשער עמי ביום אידם אל תרא גם אתה ברעתו ביום אידו ואל תשלחנה בחילו ביום אידו

¹⁴ואל תעמד על הפרק להכרית את פליטיו ואל תסגר שרידיו ביום צרה

¹⁵כי קרוב יום יהוה על כל הגוים כאשר עשית יעשה לך גמלך ישוב בראשך

¹⁶כי כאשר שתיתם על הר קדשי ישתו כל הגוים תמיד ושתו ולעו והיו כלוא היו

¹⁷ובהר ציון תהיה פליטה והיה קדש וירשו בית יעקב את מורשיהם

¹⁸והיה בית יעקב אש ובית יוסף להבה ובית עשו לקש ודלקו בהם ואכלום ולא יהיה שריד לבית עשו כי יהוה דבר

¹⁹וירשו הנגב את הר עשו והשפלה את פלשתים וירשו את שדה אפרים ואת שדה שמרון ובנימן את הגלעד

²⁰וגלת החל הזה לבני ישראל אשר כנענים עד צרפת וגלת ירושלם אשר בספרד ירשו את ערי הנגב

²¹ועלו מושעים בהר ציון לשפט את הר עשו והיתה ליהוה המלוכה